



# **PARAMANI O TE KUKI AIRANI**

---

## **TURE TAMANAKO TO TATOU VAI 2020**

### **TUATUA AKAMARAMA**

Kare teia au tuatua e tuanga no teia Ture Tamanako. E au tuatua no te akatinamou i te manako maata.

Ko teia tuanga angaanga o Te Mato Vai kua waitata i te oti. Me oti te reira e oronga ia ai kite Korona.

Ko te akateretere i te au pu paipa vai e maata tona au angaanga. No te mea ko te turanga o te vai e meitaki atu ei ka anoano ia te reira kia akara ua ia rai mate akara matatio ia e tetai au tangata marama o te vai. E no te reira tumu, ko te Cook Islands Investment Corporation (CIIC) tei akatinamou i teia kopapa iti, ko te kamupani To Tatou Vai, nana e e taangaanga i te reira.

Ko te kamupani To Tatou Vai te taangaanga nei i tetai au aronga Kuki Airani, ko te maataanga te oki mai nei kite ngutuare no vao I te basileia, e kua tau meitaki to ratou marama I te angaanga I te pae o te vai. Ko tetai pae o ratou no roto mai I te pae Infrastructure Cook Islands (ICI) te angaanga nei ki reira.

KO te akatinamouanga o teia kamupani no tetai tuatau poto ua kia rauka i teia kopapa nei kia akatinamou ia ki raro ake i tetai kopapa i raro ake i te ture kia oronga ia tona au mana akaaere e te angaanga kia aite ki tetai au pae kopapa angaanga. E no te reira ra ko teia Ture Tamanako, ka akatinamou te reira i te kopapa akaaere To Tatou Vai, nana rai tana au akatuanga moni e kimi kare e no te kimi moni puapinga e ka akaaere ia e tetai board e te CEO.

I raro ake i teia Ture Akatukeanga, ko te kopapa akaaere (board), ka oronga ia tona mana kia akatuanga i tetai moni tutaki inara ra i raro ake i tetai au akanoonooanga tinamou. Kare teia kopapa e anoano ia kia akamaata i to ratou puapinga, kia tau mari kite anoano o te iti tangata e no te katoatoa te vai. Ka oronga ia te mana kite kopapa akaaere kia akaue i tetai tutaki anga moni inara auraka i mua ake i te mataiti 2022 no te akamataanga. Ka anoano ia kia akatinamou ia tetai au apinga vaito vai inara kare te reira e vave mai. I mua ake ka akatamata ai te tutaki moni ka anoano ia tetai Ture Akatuke kite ture Nui i reira ka riro mai ei To Tatou Vai ki raro ake i te Ture Akarere e te Kopapa Akaaere tei akatinamou ia i raro ake i te Ture Competition and Regulatory Authority Act 2019.

I raro ake i te Ture Tamanako, ka anoano ia te kopapa akaaere kia aru i te au turanga o te vai e te mana ra i raro ake i te Public Health Act 2004.

Ka anoano ia te Kopapa Akaaere i roto katoa i te reira tuatau kia akaaere i te vai no Aitutaki e pera katoa te vai repo no Rarotonga e Aitutaki.

Ko teia Ture Tamaanako no runga ua te reira i te vai e no te au ra ki mua e kapiti ia mai ei to Aitutaki.

**Irava 1** akataka i te Upoko iti o te Ture Tamanako

**Irava 2** akanoono anga e kote Ture Tamanako ka mana te reira i te ra e i muri ake te Mata o te Ariki Vaine ka akatika ai kite reira.

**Irava 3** ko teia Ture ka mana ua te reira no Rarotonga e ka roto I te Akaueanga a te Cabinet kia o katoa mai a Aitutaki.

### **Pae 1 Au Mea Mua**

**Irava 4** akaari mai te au tumu o te Ture Tamanako-

- akatinamou I te kopapa akaaere; e te
- kia kitea ia te tuanga tauturu a te kavamani kite iti tangata no te oronga vai; e te
- kia rauka i teia kopapa i te rave tamou i tana au angaanga mate paunu atu i te pae o te moni e te anoano o te iti tangata no te vai mate rave angaanga auraka kia maata uatu te moni; e te
- kia vai rai te kite mate takave mai i te pirianga o te au atu enua o teia au enua o te kakapu vai; e te
- kia akamaroiroi ia te akateretereanga kite pu ia e te au tukuanga tika kia paunu ia atu kite meitaki o teia kopapa e to te katoatoa rava no to ratou inangaro i te vai kia rauka rai i te tutaki; e te
- kia oronga tamou mate tinamou e te meitaki o te vai e tona oronga anga ki vao; e te
- mate akatinamou i teia kopapa kia oronga i tana au pauanga kite CIIC.

**Irava 5** akatinamou i te au tuatua i roto i teia Ture Tamanako.

**Irava 6** ka tapeka teia Ture i te Korona

### **Pae 2 Kopapa To Tatou Vai<sup>[1]</sup><sub>SEP</sub>**

**Irava 7** akatinamou i te Kopapa Akaaere

**Irava 8** akatinamou i te au angaanga a te Kopapa Akaaere. Kia tau mari kite tumu anga o teia Ture Tamanako kapiti katoa atu kite au parani anga e te au akanoono anga no te au tuatau ki mua o te vai.

**Irava 9** oronga i te mana kite Kopapa Tutara mei to tetai tangata okotai rai e kia taangaanga ia no te reira pae angaanga ua.

**Irava 10** oronga kite Kopapa Akaaere te mana kia akakaioua moni kia tau kite akanoonooanga a te Ministry of Finance and Economic Management Act 1995-96. Kia tau mari katoa ki tetai au putuputuanga i raro ake i te ture. Ka rauka i teia Kopapa Akaaere e kia rave i tetai tuanga paruru no tetai au akakaiouanga moni ma tetai akakotinga anga no tetai au apinga tei akatu ia ki runga i te enua o te au atu enua.

### **Pae 3**

#### **Au Atu Enuua**

##### *Au Atu Enuua e te au Kumiti*

**Irava 11** oronga i te tikaanga kite Kopapa Akaaere kia tomo ki roto i tetai arikianga e te au atu enua te ka tapeka ia ratou e te Korona no runga i tetai au mataara i raro ake i te Ture Infrastructure 2019.

##### *Kumiti o te au Kakapu Vai*

**Irava 12** akatinamou anga i te au Kumiti Kakapu Vai, ko te tumu maata, koia oki, kia akarongo i tetai au patianganga i raro ake i te Irava 24 e te 25, mate akara matariki atu i tetai au angaanga ke atu te ka tamanamanata atu i te au ngai vairanga vai.

**Irava 13** akatinamou i te au kumiti o te au kakapu vai ta-takitai. Ko te au atu enua o te enua kakapu vai ka rauka ia ratou i te iki mai i tetai mata no ratou ki runga i te kumite. Ko te Kopapa Akaaere ka rauka ia ratou i te akatinamou i te reira atu enua ki runga i te kumiti.

**Irava 14** akatinamou e ka rauka i tetai uatu tangata kia iki mai aia ki roto i te kumiti kakapu vai mei te mea ra e ka akatinamou te Kopapa Akaaere i te reira tangata ka anoano ia aia e e atu enua i runga i te reira enua.

**Irava 15** akatinamou e ko te CEO o te Kopapa Akaaere e mata aia mate kore e tikaanga iki ki roto i te au kumiti kakapu vai e ko te CEO ua te kumiti mei te mea e kare te enua i kimi ia ake.

**Irava 16** oronga mai e kote au aronga angaanga (directors) kare ratou e anoano ia kia akangaroi i te taime okotai, kia tamou uatu rai i ta ratou au tu angaanga. Tetai akateretereanga tei tau rai kite kumiti akaaere i raro ake i te Ture Land (Facilitation of Dealings) 1970 tei akataka ia mai.

**Irava 17** akaari mai e kote au tangata tei ikiia no tetai au ngai tei tuera mai no tetai 3 mataiti e kote au mema ka rauka ia ratou kia iki akaou ia mai.

**Irava 18** ka anoano ia te Kopapa Akaaere kia tutaki i te au kumiti kakapu kite moni mei tei akataka ia mai i raro ake i te ture iti. .

**Irava 19** kote au mema o te kumiti kakapu kare ratou e tapeka ia ki ta ratou au angaanga i rave me kore kare i rave mei te mea e kua irinaki ratou e ko ta ratou i rave e kua tau tikai.

**Irava 20** ka anoano ia te kumiti kakapu, I roto i ta ratou uipaanga mua, kia iki mai i to ratou

Arataki. Ka uipa te kumiti kakapu mei te mea ka kapiki te Arataki me kore e toko rua mema i tetai uipaanga me kore, mei te mea e kare te kumiti i uipaanga ana i roto i tetai 6 marama, me kapiki ake tetai mema i te uipaanga.

**Irava 21** akakite mai e kote tikaanga no te rave i te uipaanga (quorum) na te kumiti koia oki kote maataanga o te au mema. Kua tau katoa te rave i te uipaanga teleconference na te kumite e mate oronga katoa i te tikaanga kia ratou kia maani i ta ratou ture note akaaere, kia tau mari rai kite Ture Tamanako.

**Irava 22** ka anoano ia te au uipaanga kia rave ia e kia tata katoa ia.

**Irava 23** akataka mai I te au anganga a te kumite kakapu, mate akaari mai I te tumu o te kumite mei tei akataka ia mai I roto I te Irava 12.

**Irava 24** ko tetai uatu tangata tei anoano i te rave i tetai uatu anganga te ka riro i te akatuke i te tu o te vai ka anoano ia aia kia tiki atu i te arikianga a te kumiti kakapu. Ka rauka mai tetai akatikaanga mei te mea e ka ariki te maataanga o te au kumiti kakapu, mari katoa ko tetai i roto i te kumiti kakapu ka ariki e koia tetai mata o te au atu enua i runga i teia enua. Ko te CEO o te Kopapa Akaaere e tikaanga katoa tona kia oronga atu i tetai au tuatua akamarama mei te mea ra e kare e tuatua e rauka mai mei ko i te CEO na roto i tetai tuatau tau ka rauka i te kumiti kakapu i te rave kia rauka tetai tika.

**Irava 25** akaari mai e kare e rauka i te Kopapa Akaaere i te rave i tetai uatu angaanga tei topa atu kia vao mai i tana au angaanga o te akameitaki o te kakapu vai, mate kore e uipaanga, e te arikianga a te, kumiti kakapu. Ko teia irava ka topiri katoa mai ki tetai au angaanga tei topa atu ki vao i te Ture Infrastructure 2019 mate akataka papu i te tikaanga akameitaki kite au atu enua. I roto i tetai manamanata tupu viviki, ka rauka i te Kopapa Akaaere i te rave i te au angaanga mate kore e uriuri tuatua e te akatikaanga inara ka anoano ia ratou kia akakite viviki atu kite kumiti kakapu e eaa te angaanga i rave ia.

#### **Pae 4 Au Angaanga**

**Irava 26** te oronga nei i te tikaanga kite Kopapa Akaaere kia akatinamou e te tiati i tetai moni tutaki no te tari vai e te tutaki moni no te va'i vai. Ko tetai moni tero me kore moni tutaki ka anoano ia kia akakite ia kia mua mei tetai okotai mataiti. Ko teia irava ka akatika aia kia akatuke i te tutaki moni kia tau kite maata o te vai e oronga ia nei ki tetai au tangata e tana akapuapinga vai, mate akatuke katoa i te tutaki moni kite au ngutuare, pae tanu me kore kimi paupinga. No te akatinamou i tetai au tutakianga, ka anoano ia te Kopapa Akaaere kia akara i te anoano o te tangata e ka maranga ia ratou i te tutaki e ka rauka katoa i te tauturu i te Kopapa Akaaere. Maata atu, ko tetai au moni tei akatuaanga ia no te akaiti i te puapinga kia akataka ia ki tetai akapapaanga kia taangaanga ia no te tuanga o te vai. Auraka te reira kia riro te riro ei "ngutupa na muri" kia puapinga ia te Korona.

**Irava 27** oronga nei i te tikaanga kite Kopapa Akaaere kia aka-iti i te vai kia ratou e kare e tutaki ana i ta ratou au moni tutaki. Inara, e au ture tetai ka anoano ia kia aru matatio ia. Kia kite pu ia

e kote vai e mea puapinga rava kite oraanga tangata, ko te Kopapa Akaaere ka rauka i te aka-iti, inara kare e tipu takiri i te vai, no te kore e tutaki. Ka rauka i te tipu i te vai mei te mea e kua kino te paipa vai me kore te meitaki o te vai, me kore ra kua maata te vai i maringi ki vao i te au paipa.

**Irava 28** tarua atu i te akapakari i te irava 26 i te akapapu e kote au moni tei koi ia mai no te vai kia taangaanga ua ia te reira no te vai.

**Irava 29** ka anoano ia te au ngutuare katoatoa, mari ua no tetai au tumu ke, kia tapeka ia rai kite kupenga vai.

**Irava 30** ka anoano ia te Kopapa Akaaere kia rave i te angaanga tau no te akatuaanga o te vai. Mei te mea e irinaki te Kopapa Akaaere e kua maata rava ta tetai tangata akapou anga vai e kua ngere tetai, ka rauka ia ratou i te aka-iti mai i te vai kite reira tangata. Mei te mea e kua maata te kaimoumou anga o te vai, ka rauka i te Kopapa Akaaere, i roto i te 24 ora, kia tipu me kore aka-iti mai i te vai. I te tuatau maro ka rauka i te Kopapa Akaaere i te vaito no te akataeanga o te vai.

**Irava 31** akatinamou no te akataeanga vai tutaki kore kite katoatoa. Ko te oronga anga vai ka akatinamou ia te reira e te Ture iti. No te tuanga o te oroanga vai tutaki kore kote manakoanga e nate Korona e tutaki i te tuke o te moni tutaki, ko te Kopapa Akaaere kua rauka ke ana tana moni tutaki, me e moni tutaki tetai, kua rauka ke tana.

### **Pae 5** **Akaaere** *Akanooanga*

**Irava 32** ka anoano ia te Kopapa Akaaere kia oronga i tana au parani akanoonooanga mate akakite ki te katoatoa kia rauka i tetai uatu kia akakite i to ratou manako e kia oronga iatu kite kumiti kakapu no ta ratou tuatua. Ko te parani openga kia oronga ia kite katoatoa rava i runga i te roro uira e pera katoa te opati o te Kopapa Akaaere.

#### *Au Mema e te akanoonoo a te Board*

**Irava 33** te akatinamou anga o te au mema board o te Kopapa Akaaere ko te “board” mei te 5 kite 7 mema. Okotai rai tikaanga, ko teia au tangata te ka iki ia mai na te Board o te Cook Islands Investment Board Corporation e iki. Ko te tikaanga okotai e tangata turanga tau te ka iki ia e te Board o te Cook Islands Investment Corporation na roto i te tamanakoanga a te Minita. Ko te au mema o te Board kia o mai tetai aronga tuke. Ko ratou, te au mema o te Board kia rauka te turanga tei anoano ia i akataka ia i roto i te irava 35(3). Ko te Arataki o te Board koia katoa tetai o te au tangata tei iki ia ei Arataki e te pupu o te Cook Islands Investment Corporation.

**Irava 34(1) e te (2)** tuanga no te tuatau iki ia ki runga i te taoanga. I te akamataanga, e 2 nga tangata kia iki ia e 2 mataiti, e e 3 tangata no e 3 mataiti. Ko te tumu no teia e auraka roa kia ngaro te tu akaaere i roto i tetai tuatau okotai. Ko te au tangata tei iki ka mou ratou e 3 mataiti.

**Irava 34(3)** akatinamou e auraka roa tetai tangata kia noo ki runga i te board no tetai 12 mataiti akangaroi kore.

**Irava 34(4)** ko tetai tangata (director) e ka ope tona tikaanga kia noo rai aia ki reira e tae ua atu-

- kite tuatau e rauka mai ei tona mono; me kore
- kia rauka mai tona tuatua akapapu tata e kare aia e iki akaou ia.

**Irava 34(5)** akatinamou e ko tetai tangata (director) kare ona tikaanga ki tetai tutaki anga me kore au tikaanga i te mea e kua pou tona tuatau.

**Irava 35** akanoonooanga o te au pepa apii kia rauka te tikaanga kia iki no te angaanga. E tangata e kua tae mataiti kite 21 e kia retita ia aia ki roto i te akapapaanga a te Cook Islands Investment Corporation i raro ake i te akapapaanga e ka tau rai te reira tangata kia iki ia ki runga i te Board.

Pera katoa, e tangata te ka rauka iaia tetai o teia au takainga e 6, ko teia:

- marama e te kite o te akateretere o tetai o teia au tuanga te akanoonooanga o te akataeanga vai repo;
- akataeanga vai ma;
- marama i te pae akateretere anga kavamani, te pae o te poroti, me kore tetai putuputuanga angaanga akatae vai;
- e pepa i roto i te akapapa moni me kore numero;
- angaanga ana me kore te angaanga ture nei, maata atu i te pae ture kimi paupinga;
- rave ana me kore te rave nei rai i tana kimi puapinga, mate rekoti meitaki i roto i te reira;
- turanga marama maata i te pae oraanga e te puapinga i roto i te turanga enua i roto nei i te Kuki Airani e te au akatuke anga kite iti Kuki Airani.

**Irava 36** akanoonoo anga no te tipu ke i tetai tei iki anga ki runga i te Board. Kare tetai tangata e iki ia ki runga i te putuputu anga o te Board mei te mea e:

- e maki tona me kore turanga e ka riro i te akatuke i tana tukuanga tika, tu tukatau, upoko maramarama;
- e mema Paramani aia;
- kua akaapa ia aia no tetai akaapaanga i roto i tetai uatu basileia e kote akautuanga e auraka e tere atu kite 2 mataiti i roto i te are tapekaanga;
- e rekoti to te reira tangata e kare aia e tutaki ana i tana au kaiou i te tuatau tikai;
- e tangata e maata atu i te 30% tana tea (share) me kore koia te tangata angaanga a te kamupani i te tuatau ka topiri ia ai te reira;
- e tangata tuanga tana i roto i tetai kamupani, e director me kore Arataki i roto i tetai kamupani e aiteite kite kimi paupinga a teia Kopapa Akaaere e penei e ka tupu mai tetai tikaanga ka ta'i'i.

**Irava 37** akatinamou i tetai au turanga ke atu no te iki anga o te Arataki o te Board. Ei kapiti atu i te akatuke atu i te turanga o te tuanga 35, kia tau mari no te iki anga e Tutara Arataki kite Kopapa Akaaere, ka anoano ia teia tangata:

- kua riro ana aia ei tangata angaanga (director) no tetai tuatau e 2 mataiti e no tetai kopapa akatinamou ia i raro i te ture;
- e noo tinamou ana aia ki roto nei i te Kuki Airani.

**Irava 38** akara maata ki roto i te tuanga o te tipuke i raro ake i te tuanga ou tuanga 36 te akara anga i tetai au ngutupa ke atu.

**Irava 39** akatinamou e ko te au mana o te Kopapa Akaaere kare te reira e tamanamanata i te pae e tuera ua nei i roto i te au mema o te Board.

**Irava 40 kite 42** akanoonoo anga o te au ture uipaanga a te board, arataki anga o te uipaanga, ko te muna o te au tuatua tei uriuri ia i roto i te uipaanga, ka akapeea te au manamanata i te akatikatika na roto i te Kopapa Akaaere, te CEO, aronga angaanga, e te akairo retita o te au tangata piri (ka anoano ia te au aronga angaanga (directors) kia akaki)

**Irava 43** akaari mai e na te CIIC e akatinamou i te tutaki anga o te au directors e tetai atu au akapouanga e na ratou rai te reira.

**Irava 44** akara kite kotinga o te paruru o tetai (director), akamama mai, te CEO, aronga mamaata e te aronga angaanga no to ratou kotinga paruru i te rave anga i ta ratou au angaanga i raro ake i te ture mate irinaki tau.

**Irava 45** ka anoano ia te CEO kia ta angaanga i tetai tangata tau ei tekeretere.

**Irava 46** ka anoano ia te aronga angaanga kia rave i ta ratou angaanga kia tau kite ture, kia aru i te akaueanga a te CIIC, e no te meitaki o te Kopapa Akaaere.

**Irava 47** ka anoano ia te Board kia iki i tetai CEO mate oronga i te tikaanga kite CEO kia iki i tona aronga angaanga e te aronga tareu (Contractors). Ka anoano katoa ia te CEO kia akatinamou i te au akateretere anga (policies) e kia rave aia i te tu o te pu meitaki, kote au akateretere anga o te au tangata e mea tau kia rauka katoa i te aronga tareu i te uriuri tuatua kite katoatoa, mate tau, e te marama puia.

**Irava 48** akatikaanga nate Board kia oronga ia te mana kite CEO, e ko te CEO, kia oronga katoa i te mana ki tetai tangata angaanga me kore aronga tareu.

### *Ripoti Moni*

**Irava 49** akatinamou e kia ripoti mai te Kopapa Akaaere i te au mataiti ravarai tetai au akapapaanga no te au manakonako anga kia tau kite tetai au ture akatuke anga tei anoano ia e te CIIC.

**Irava 50** ka anoano ia te Kopapa Akaaere kia tuku mai i ta ratou ripoti mataiti i mua ake ka pou ei te 3 marama o te openga mataiti. Kia oronga i te ripoti kite CIIC e tate kumite kakapu. Ko te ripoti kia o mai tei raro nei-

- Akapapa anga moni:
- ripoti nate otita:
- akapapaanga no te au manamanata, kino me ka tupu ake:
- akaaiteite o te tu angaanga e te au ripoti tei akakite ia mai ana.

**Irava 51** oronga te tikaanga kite Kopapa Akaaere kia akatuera i tetai puka pangaka kia tau kite akateretere anga a te Ministry of Finance and Economic Management Act 1995-96.

**Irava 52** akatinamou i te au kotinga ripoti moni a te Kopapa Akaaere e te au turanga ka anoano ia ratou kia aru.

**Irava 53** ka anoano ia te Kopapa Akaaere kia oronga mai i tetai ripoti-kuata no tetai au manamanata.

**Irava 54** akapapaanga no runga i ta te Kopapa Akaaere rekoti anga.

**Irava 55** ka anoano ia te puka (account) a te Kopapa Akaaere kia otita ia e kia oronga ia kite CIIC, ki te Minita, e te au kumiti kakapu.

## **Pae 6**

### **Au akaapaanga e te akakotingaanga**

**Irava 56** ka apa tetai no te kaimoumou puapinga kore i te vai.

**Irava 57** ka akaapa ia tetai na roto i te angaanga pikikaa, me kore akavare, e te pikikaa kite Kopapa Akaaere auraka kia tutaki moni.

**Irava 58** ka anoano ia tetai tangata tei akakoro mate kore e manako atu e ka kino te vai kia akameitaki i te reira e pera te akapouanga moni.

**Irava 59** ka akaapa ia tetai te ka rave i tetai angaanga e ka anoano ia te akatika anga a te kumiti kakapu e kare rai te reira i rave ia mai ana.

**Irava 60** te paruru nei i te oko o te vai mate kore e akatika anga a te Kopapa Akaaere e ka akaapa ia tetai uatu.

## **Pae 7**

### **Turanga Vai**

**Irava 61** ka anoano ia te Kopapa Akaaere kia akara i te vai e tuku ia nei kite katoatoa e te au ngai tiki vai inu. Kia akara ia teia au vai i te au marama katoatoa.

**Irava 62** ka anoano ia te Kopapa Akakaere kia tuku i tetai au tuatua akakite kite katoatoa rava kia tunu i to ratou vai inu mei te mea ko te rekoti e kare e tau kia inu ia te vai mate kore e tunu.

## **Pae 8**

### **No te Katoatoa e tetai pae ke atu**

**Irava 63** akamama mai i te Kopapa Akaaere mei tetai au manamanata no te-

- tamanamanata o te tuku anga o te vai; e te
- au kino me kore takingakino kite au paipa vai e tetai au apinga tei akatinamou ia e tetai aronga me kore tangata; e te
- kino tei akatupu ia e te aronga angaanga a te Kopapa Akaaere me kore kite ngutuare o tetai;



- me kore kino na roto i te vai.

**Irava 64** kare te Kopapa Akaaere e tutaki tero takake atu i te VAT.

**Irava 65** akatinamou e ko te Kopapa Akaaere e tuanga iti teia no te CIIC.

*Ture iti*

**Irava 66** tikaanga kite Mata o te Ariki Vaine kia anga i tetai au ture iti mei te mea e ka amiri i teia ture.

**Irava 67** rave i te akatuke i tetai au ture tei akataka ia i roto i te **Akapapaanga 1**.

*Tuatau akatuke e te tiaki*

**Irava 68** tuke ke atu i tona aronga angaanga, au apinga, e te au angaanga a To Tatou Vai kite kopapa ou tei akatinamou ia e teia ture.

**Akapapaanga 1** akataka i te au akatuke ki teia au ture:

- Cook Islands Investment Corporation Act 1998:
- tee Public Health Act 2004:
- te Land (Facilitation of Dealings) Act 1970 kia oronga i te tikaanga kite uipaanga kia iki i te kumiti kakapu:
- te Rarotonga Waterworks Ordinance 1961.

**Akapapaanga 2** akataka mai i te au mapu enua o te au o e te au kotinga o te au kakapu vai.

**Akapapaanga 3** akataka mai i te au atu enua o runga i teia au enua kakapu vai.

---